

四庫全書

集部

欽定四庫全書

樂府詩集卷六十二

宋 郭茂倩 輯

雜曲歌辭

傷歌行

古 辭

傷歌行側調曲也古辭傷日月代謝年命  
適盡絕離知友傷而作歌也

昭昭素明月輝光燭我牀憂人不能寐耿耿夜何長微

風吹閨闥羅帷自飄揚攬衣曳長帶屣履下高堂東西  
安所之徘徊以彷徨春鳥翻一作南飛翩翩獨翔翔悲  
聲命儔匹哀鳴傷我腸感物懷所思泣涕忽霑裳佇立  
吐高吟舒憤訴穹蒼

同前

張籍

黃門詔下促收捕京兆君

一作尹

繫御史府出門無復部

曲隨親戚相逢不容語辭成謫尉南海州受命不得須  
吏留身著青衫騎惡馬東門之東無送者郵夫防吏急

喧驅往往驚墮馬蹄下長安里中荒大宅朱門已除十  
二戟高堂舞榭鎖管絃美人遙望西南天

同前

孟郊

衆毒蔓貞松一枝難久榮豈知黃庭客仙不生不成春  
色捨芳蕙秋風遶枯莖彈琴不成曲始覺知音傾館月  
改舊照弔賓寫餘情還舟空江上波浪送銘旌

同前

莊南傑

兔走鳥飛不相見人事依俛速如電王母天桃一度開

玉樓紅粉千回變車馳馬走咸陽道石家舊宅空荒草  
秋雨無情不惜花芙蓉一一驚香倒勸君莫謾栽荆棘  
秦皇虛費一作負驅山力英風一去更無言白骨沉埋莫  
山碧

悲歌

古辭

悲歌可以當泣遠望可以當歸思念故鄉鬱鬱累累欲  
歸家無人欲渡河無船心思不能言腸中車輪轉

同前

李白

悲來乎悲來乎主人有酒且莫斟聽我一曲悲來吟悲  
來不吟還不笑天下無人知我心君有數斗酒我有三  
尺琴琴鳴酒樂兩相得一杯不啻千鈞金悲來乎悲來  
乎天雖長地雖久金玉滿堂應不守富貴百年能幾何  
死生一度人皆有孤猿坐啼墳上月且須一盡杯中酒  
悲來乎悲來乎鳳鳥不至河無圖微子去之箕子奴漢  
帝不憶李將軍楚王放却屈大夫悲來乎悲來乎秦家  
李斯早追悔虛名撥向身之外范子何曾愛五湖功成

名遂身自退劔是一夫用書能知姓名惠施不肯千萬  
乘卜式未必窮一經還須黑頭取方伯莫謾白首為儒  
生

悲哉行

陸機

歌錄曰悲哉行魏明帝造樂府解題曰陸  
機云遊客芳春林謝惠連云羈人感淑節  
皆言客遊感物憂思而作也

遊客芳春林春芳傷客心和風飛清響鮮雲垂薄陰蔥

草饒淑氣時鳥夕好音翩翩鳴鳩羽喈喈倉庚音

一作吟

幽蘭盈通谷長芳被高岑女蘿亦有託蔓葛亦有尋傷  
我客遊士憂思一何深目感隨氣草耳悲詠時禽寤寐  
多遠念緬然若飛沈願託歸風響寄言遺所缺

同前

謝靈運

萋萋春草生王孫遊有情差池鶯始飛大梟柳

一作挑始

榮灼灼桃悅色飛飛鶯弄聲檐上雲結陰澗下風吹清  
幽樹雖改觀始終在初生松蒿歡蔓延樛葛欣藟紫眇



然遊宦子晤言時未并鼻感改朔氣眼

一作心

傷變節榮

侘僚豈徒然澶

一作緬

漫絕音形風來不可託鳥去豈為

聽

同前

謝惠連

羈人感淑節緣感欲回次我行詎幾時華實驟舒結覩  
實情有悲瞻華意無悅覽物懷同志如何復乖別翩翩  
翔禽羅關關鳴鳥列翔禽常疇偶所歎獨乖絕

同前

沈約

旅遊媚年春年春媚遊人徐光旦垂彩和露晚凝津時  
嚶起稚葉蕙氣動初蘋一朝阻舊國萬里隔良辰

同前

孟雲卿

孤兒去慈親遠客喪主人莫吟苦辛曲誰忍聞可聞可  
聞不可說去去無期別行人念前程不待參辰沒朝亦  
常苦飢莫亦常苦飢飄飄萬餘里貧賤多是非少年莫  
遠遊遠遊多不歸

同前

白居易

悲哉為儒者力學不能疲讀書眼欲暗秉筆手生胝十  
上方一第成名常苦遲縱有宦達者兩鬢已成絲可憐  
少壯日適在窮賤時丈夫老且病馬用富貴為沈沈朱  
門宅中有乳臭兒狀貌如婦人光明膏粱肌手不把書  
卷身不擐戎衣二十襲封爵門承勲戚資春來日日出  
服御何輕肥朝從博徒飲莫有倡樓期評封還酒債堆  
金選蛾眉聲色徇馬外其餘一無知山苗與澗松地勢  
隨高卑古來無奈何非君獨傷悲

同前

鮑溶

促促晨復昏，死生同一源。  
貴年不懼老，賤老傷久存。  
朗朗哭前歌，絳旌引幽魂。  
來為千金子，去臥百草根。  
黃土塞生路，悲風送回轅。  
金鞍舊良馬，四顧不出門。  
生結千歲念，榮及百代孫。  
黃金買性命，白刃讎一言。  
寧知北山上松柏，侵田園。

妾薄命二首

曹植

樂府解題曰：妾薄命，曹植云：日月既逝西。

藏蓋恨燕私之歡不久梁簡文帝云名都  
多麗質傷良人不返王嬙遠聘盧姬嫁遲  
也

攜玉手喜同車北上雲閣飛除釣臺蹇產清虛池塘靈  
沼可娛仰汎龍舟綠波俯擢神草枝柯想彼宓妃洛河  
退詠漢女湘娥

日月既逝

一作日  
既逝矣

西藏更會蘭室洞房華燈步障

一作  
先置

舒光皎若日出扶桑促樽

一作  
酒

合坐

一作  
座

行觴主人起

舞筵盤能者穴觸別端騰觚飛爵闌干同量等色齊顏

任意交屬所歡朱顏發外形蘭袖隨禮容極情妙

一作展

舞仙仙

一作儂儂

體輕裳解

一作解裳

履遺絕纓俛仰笑諠無呈

攬持佳人玉顏齊舉金爵翠盤

一作槃

手形羅袖良難脫

弱不勝珠環坐者歎息舒顏御中裊粉君傍中有霍納

都梁難舌五味雜香進者何人齊姜恩重愛深難忘召

延親好宴私但歌杯來何遲客賦既醉言歸主人稱露

未晞

同前

梁簡文帝

名都多麗質，本自恃容姿。  
蕩子行未至，秋胡無定期。  
玉貌歇紅臉，長嘔串翠眉。  
奩鏡迷朝色，縫鍼脆故絲。  
本異搖舟咎，何關竊席疑。  
生離愁拊背，溘死詎來遲。  
王嬙貌本絕，踉蹌入氈帷。  
盧姬嫁日晚，非復少年時。  
一作年少轉山猶可大，烏白望難期。  
妾心徒自苦，傍人會見嗤。

同前

劉孝威

去年從越障，今歲歿胡廷。  
嚴霜封碣石，驚沙暗井陘。  
玉

簪久落鬢羅衣長挂屏浴蠶思漆水挑桑憶鄭垌寄書  
朝鮮吏留釧武安亭的言戎夏隔但念心契冥不見豐  
城劍千祀復同形

同前

劉孝勝

馮姜朝汲遠徐吾夜火窮舊井長逢幕隣燈欲未通五  
逐無來娉三娶盡凶終離災陽祿觀就廢昭臺宮乘屯  
迹雖淑應戚理恒同復傳蘇國婦故愛在房櫳愁眉歇  
巧黛啼妝落艷紅織書凌竇錦敏誦軼繁弓離劍行當



合春牀忽怨空

同前

崔國輔

雖入秦帝宮不上秦帝牀夜夜玉牕裏與他卷羅裳

同前

武平一

有女妖且麗徘徊湘水湄水湄蘭杜芳採之將寄誰  
犀發皓齒雙蛾嚙翠眉紅臉如開蓮素膚若凝脂綽約  
多逸態輕盈不自持常矜絕代色復恃傾城姿子夫前  
入侍飛鷺復當時正悅掌中舞寧哀團扇詩洛川昔云

遇高唐今尚違幽閣禽雀噪閒堦草露滋流景一何速  
年華不可追解珮安所贈怨咽空自悲

同前

李百藥

團扇秋風起長門夜月明羞聞拊背入恨說舞腰輕太  
常應已醉劉君恒帶醒橫陳每虛設吉夢竟何成

同前

杜審言

草綠長門閉苔青永巷幽寵移新愛奪泣下故情留啼  
鳥驚殘夢飛花攪獨愁自憐春色罷團扇復迎秋

同前

劉元淑

自從離別守空閨遙聞征戰起雲梯夜夜愁君遠海外  
年年棄妾渭橋西陽春白日照空暖紫燕銜花向庭滿  
綠鸞琴裏怨聲多飛鵲鏡前妝梳斷誰家夫婿不從征  
應是漁陽別有情莫道紅顏燕地少家家還似洛陽城  
且逐新人殊未歸還令秋至夜霜飛北斗星前橫度雁  
南樓月下搗寒衣夜深聞雁腸欲絕獨坐縫衣燈又滅  
暗啼羅帳空自憐夢度陽關向誰說每憐容貌宛如神

如何薄命不勝人願君朝夕燕山至好作明年楊柳春

同前

李白

漢帝重

一作寵

阿嬌貯之黃金屋咳唾落九天隨風生珠

玉寵極愛還歇妬深情却疎長門一步地不肯暫回車

雨落不上天水覆難再收

一作重難收

君情與妾意各自東

西流昔日芙蓉花今成斷根草以色事他人能得幾時

好

同前

孟郊

不惜十指弦為君千萬彈常恐新聲至

一作發

坐使

一作使我

故聲

一作曲

殘棄置今日悲即是昨日歡將新變故易持

故為新難青山有蘼蕪淚葉長不乾空令後代人採掇

幽思攢

一作思幽蘭

同前

張籍

薄命婦良家子無事從軍去萬里漢家天子平四夷護  
羌都尉裹屍歸念君此行為死別對君裁縫泉下衣與  
君一日為夫婦十年萬歲亦相守君愛龍城征戰功妾

願青樓歡樂同人生各各有所欲詎得將心入君腹

同前三首

李端

憶妾初嫁君花鬟如綠雲回燈入綺帳對

一作轉

面脫羅

裙折步教人學偷香與客熏容顏南國重名字北方聞  
一從失恩意轉覺身憔悴對鏡不梳頭倚窓空落淚新  
人莫恃新秋至會無春從來閉在長門者必是宮中第  
一人

玉壘城邊爭走馬銅蹄市裏共乘舟鳴環動珮思無盡

掩袖低巾淚不流  
疇昔將歌邀客醉  
如今欲舞對君羞  
忍懷賤妾平生曲  
獨上襄陽舊酒樓

自從君棄妾  
憔悴不羞人  
唯餘壞粉淚  
未免映衫勻

同前

盧綸

妾年初二八  
兩度嫁狂夫  
薄命今猶在  
堅貞掃地無

同前

盧弼

君恩已斷盡成空  
追想嬌歡恨莫窮  
長為薜蘿光曉日  
誰知團扇送秋風  
黃金買賦心徒切  
清路飛塵信莫通

閒凭玉欄思舊事幾回春夢泣殘紅

同前

胡曾


阿嬌初失漢皇恩舊賜羅衣亦罷薰  
欹枕夜悲金屋雨  
卷簾朝泣玉樓雲  
宮前葉落鴛鴦瓦  
架上塵生翡翠裙  
龍騎不巡時漸久  
長門長掩綠苔文

同前

王貞

薄命頭欲白頻年嫁不成  
秦娥未十五昨夜事公卿  
豈有機杼力空傳歌舞名  
妾專修婦德媒氏却相輕





樂府詩集卷六十二

欽定四庫全書

集部

樂府詩集卷六十三至五

詳校官庶吉士臣柳邁祖

助教臣常循覆勘

總校官知縣臣繆琪  
校對官編修臣秦瀛

謄錄監生臣孫承基

欽定四庫全書

樂府詩集卷六十三

宋 郭茂倩 輯

雜曲歌辭

羽林郎

辛延年

漢書曰武帝太初元年初置建章營騎後  
更名羽林騎屬光祿勳又取從軍死事之  
子孫養羽林官教以五兵號羽林孤兒顏

師古曰羽林宿衛之官言其如羽之疾如  
林之多一說羽所以為主者羽翼也後漢  
書百官志曰羽林郎掌宿衛侍從常選漢  
陽隴西安定北地上郡西河六郡良家補  
之地里志曰漢興六郡良家子選給羽林  
是也又有胡姬年十五亦出於此

昔有霍家奴姓馮名子都依倚將軍勢調笑酒家胡胡  
姬年十五春日獨當爐長裾連理枝廣袖合歡襦頭上

藍田玉耳後大秦珠兩霍何窈窕一世良所無一鬟五  
百萬兩鬟千萬餘不意金吾子娉婷過我廬銀鞍何煜  
燭翠蓋空踟躕就我求清酒絲繩提玉壺就我求珍肴  
金盤鱠鯉魚貽我青銅鏡結我紅羅裾不惜紅羅裂何  
論輕賤軀男兒愛後婦女子重前夫人生有新故貴賤  
不相踰多謝金吾子私愛徒區區

羽林行

王建

長安惡少出名字樓下劫商樓上醉天明下直明光宮

散入五陵松柏中百回殺人身合死赦書尚有收城功  
九衢一日消息定鄉吏籍中重改姓出來依舊屬羽林  
立在殿前射飛禽

同前

孟郊

朔雪寒斷指朔風勁裂冰胡中射鵬者此日猶不能翩  
翩羽林兒錦臂飛蒼鷹揮鞭決白馬走出黃河凌

同前

鮑溶

朝出羽林宮入參雲臺議獨請萬里行不奏和親事君

王重年少深納閒邊利寶馬雕玉鞍一朝從萬騎煌煌  
都門外祖帳光七貴歌鐘樂行軍雲物慘別地蕭茄整  
部曲幢蓋動郊次臨風親戚懷滿袖兒女淚行行復何  
贈長劍報恩字

胡姬年十五

劉琨

虹梁照曉日淥水泛香蓮如何十五少含笑酒壚前花  
將面自許人共影相憐回頭堪百萬價重為時年

當壚曲

梁簡文帝

漢書曰司馬相如與卓文君俱之臨邛盡  
賣車騎買酒舍乃令文君當盧相如身自  
著犢鼻褌與庸保雜作滌器於市中郭璞  
曰盧酒盧也顏師古曰賣酒之處累土為  
盧以居酒甕四邊隆起其一面高形如鍛  
盧故名盧當壚曲蓋取此也

十五正團圓流光滿上蘭當壚設夜酒宿客解金鞍迎  
來挾琴易送別唱歌難欲知心恨急翻令衣帶寬



同前

范靜妻沈氏

逶迤飛塵唱宛轉  
遠梁聲調弦可以進  
蛾眉畫未成

齊瑟行

歌錄曰名都美女白馬並齊瑟行也曹植  
名都篇曰名都多妖女美女篇曰美女妖  
且閒白馬篇曰白馬飾金羈皆以首句名  
篇猶豔歌羅敷行有日出東南隅篇豫章  
行有鴛鴦篇是也

名都篇

曹植

名都者邯鄲臨淄之類也以刺時人騎射之妙游騁之樂而無憂國之心也

名都多妖女京洛出少年寶劍直千金被服光

一作麗

且

鮮鬪雞東郊

一作長安

道走馬長楸間馳驅未能半雙兔過

我前攬弓捷鳴鏑長驅山南山

一作驅上彼南山

左挽因右發

一縱兩禽連餘巧

一作功

未及展仰手接飛鳶觀者咸稱

善衆工歸我妍歸來宴平樂美酒斗十千膾鯁胎鰕

炮鼈炙熊蹯鳴儔嘯匹旅列坐竟長筵連翩擊鞠壤巧  
捷惟萬端白日西南馳光景不可攀雲散還城邑清晨  
復來還

美女篇

曹植

美女者以喻君子言君子有美行願得明  
君而事之若不遇時雖見徵求終不屈也

美女妖且閒采桑歧路間柔條紛冉冉葉落何翩翩攘  
袖見素手皓腕約金環頭上三一作金爵釵腰佩翠琅玕

明珠交玉體珊瑚間木難羅衣何飄飄輕裾隨風還顧  
眄遺光采長嘯氣若蘭行徒用息駕休者以忘餐借問  
女何居乃在城南端青樓臨大路高門結重關容華耀  
朝日誰不希令顏媒氏何所營玉帛不時安佳人慕高  
義求賢良獨難衆人徒嗷嗷安知彼所觀盛年處房室  
中夜起長歎

同前

傅玄

美人一何麗顏若芙蓉花一顧亂人國再顧亂人家未

亂猶可奈何

同前

梁簡文帝

佳麗盡關情  
風流最有名  
約黃能効月  
裁金巧作星  
粉光勝玉靚  
衫薄擬蟬輕  
密態隨流臉  
嬌歌逐軟聲  
朱顏半已醉  
微笑隱香屏

同前

蕭子顯

章丹暫輟舞  
巴姬請罷弦  
佳人淇浦出  
豔趙復傾燕  
繁穠既為李  
照水亦成蓮  
朝酤成都酒  
暝數河間錢  
餘光

欽定四庫全書

樂府詩集  
卷六十三

六

幸未借蘭膏空自煎

同前二首

魏 收

楚襄遊夢去陳思朝洛歸參差結旌旆掩靄頓駭駢變  
化看臺曲駭散屬川沂仍令賦神女俄聞要宓妃照梁  
何足豔昇霞反奮飛可言不可見言是復言非

闕

我帝更朝衣擅寵無論賤入憂不嫌微智瓊非俗  
物羅敷本自稀居然陋西子定可北南威新吳何為誤  
舊鄭果難依甘言誠易汙得失定因機無憎藥英妬心

賞易侵違

同前

盧思道

京洛多妖豔餘香愛物華恒臨鄧渠水共採鄴園花時  
搖五明扇聊駐七香車情疎看笑淺嬌深盼欲斜微津  
染長黛新溜濕輕紗莫言人未解隨君獨問家

白馬篇

曹植

白馬者見乘白馬而為此曲言人當立功  
立事盡力為國不可念私也樂府解題曰

鮑照云白馬騂角弓沈約云白馬紫金鞍  
皆言邊塞征戰之事

白馬飾金羈連翩西北馳借問誰家子幽并遊俠兒少  
小去鄉邑揚聲一作名沙漠垂宿昔秉良弓櫜天何參差

控弦破左的右發摧月支仰手接飛猱俯身散馬蹄狡  
捷過猿猴勇剽若豹螭邊城多警急胡虜一作虜騎數遷移

羽檄從北來厲馬登高堤右驅蹈匈奴左顧陵鮮卑寄  
身鋒刃端性命安所懷父母且不顧何言子與妻名編



一作  
在

壯士籍

一作高名  
在壯籍

不得中顧私捐軀赴國難視死

忽如一作  
若歸

同前

袁淑

劍騎何翩翩長安五陵間秦地天下樞八方湊才賢荆  
魏多壯士宛洛富少年意氣深自負肯事郡邑權籍籍  
關外來車徒傾國鄧五侯競書幣羣公亟為言義分明  
於霜信行直如弦交歡池陽下留宴汾陰西一朝許人  
諾何能坐相捐彰節去函谷投珮出甘泉嗟此務遠圖

心為四海懸但營身意遂豈校耳目目前俠烈良有聞古  
來共知然

同前

鮑照

白馬辟角弓鳴鞭乘北風要途問邊急雜騎入雲中閉  
壁自往夏清野逐還冬僑裝多闕絕旅服少裁縫埋身  
守漢境一作節沉命對胡封薄莫塞一作雪雲起飛沙被遠

松含悲望兩都楚歌登四墉丈夫設計誤懷恨逐邊戎

棄一作罷別中國愛要冀胡馬功去來今何道單賤生所

鐘但令塞上兒知我獨為雄

同前二首

孔稚圭

驥子踞且鳴鐵陣與雲平  
漢家嫖姚將馳突匈奴庭  
少年鬪猛氣怒髮為君征  
雄戟摩白日長劒斷流星  
早出飛狐塞晚泊樓煩城  
鐵騎四山合沙塵千里驚  
嘶笳振地響吹角沸天聲  
左碎呼韓陣右破休屠兵  
橫行絕漠表飲馬瀚海清

一作

隴樹枯無色沙草不常青  
勒石燕然道凱歸長安亭

縣官知我健四海誰不傾  
但使疆酋

滅何須甲第成當令丈夫志獨為上古英

白馬金貝裝橫行遼水傍問是誰家子宿衛羽林郎文  
犀六屬鎧寶劍七星光山虛弓響徹地迴角聲長宛河  
推勇氣隴蜀擅威彊輪臺受降國高闕翦名王射熊入  
飛觀校獵下長楊英名欺衛霍智策蔑平良島夷時失  
禮卉服犯邊疆微兵離薊北輕騎出漁陽集軍隨日暈  
挑戰逐星芒陣移龍勢動營開虎翼張衝冠入死地攘  
臂越金湯塵飛戰鼓急風交征旆揚轉鬬平華地追奔

掃帶方本持身許國沉復武功彰會令千載後流譽滿  
旂常

同前

沈約

白馬紫金鞍停鑣過上蘭寄言狹斜子詎知隴道難赤  
坂途三折龍堆路九盤冰生肌裏冷風起骨中寒功名  
志所急日莫不遑飡長驅入右地輕舉出樓蘭直去已  
垂涕寧可望長安匪期定遠封無羨輕車官惟見恩義  
重豈覺衣裳單本持驅命荅幸遇身名完

同前

王僧孺

千里生冀北玉鞘黃金勒散蹄去無已搖頭意相得豪  
氣發西山雄風擅東國飛鞚出秦隴長驅繞岷楚承謨  
若有神稟算良不惑潞汨河水黃參差嶂雲黑安能對  
兒女垂帷弄毫墨兼弱不稱雄後得方為特主恩亦何  
已君恩良未塞不許跨天山何由報皇德

同前

徐悱

研蹄飾鏤鞍飛鞚度河干少年本上郡遨遊入露寒劍

琢荆山玉彈挹隋珠丸聞有邊烽急飛侯至長安然諾  
竊自許捐軀諒不難占兵出細柳轉戰向樓蘭雄名盛  
李霍壯氣勇彭韓能令石飲羽復使髮衝冠要功非汗  
馬報効乃鋒端日沒塞雲起風悲胡地寒西征馘小月  
北去腦烏丸歸報明天子燕然石復刊

同前

王 胄

白馬黃金鞍蹀躞柳城前問此何鄉客長安惡少年結  
髮從戎事馳名振朔邊良弓控繁弱利劍揮龍泉披林

扼彫虎仰手接飛鳶前年破沙漠昔歲取祁連折衝摧  
右校擐旗殪左賢虎彌還謝力慶忌本推僂海外平遐  
險來庭識負塞三韓勞薄伐六事指幽燕良家選河右  
猛將征西山浮雲屯羽騎蔽日引長旃自矜有餘勇應  
募忽爭先王師已得雋夷首失求全鼓行徇玉檢乘勝  
蕩朝鮮志勇期功立寧憚微軀捐不羨山河賞唯希竹  
素傳

同前

辛得源



任俠重芳辰相從競逐春金羈絡赭汗紫縷應

一作紫陌映紅

塵紅塵寶劍提

一作橫

三尺雕弓韜六鈞鳴珂蹕細柳飛

蓋出宜春遙見浮光

一作雲

發懸知上頭人

同前

李白

龍馬花雪毛金鞍五陵豪秋霜切玉劍落日明珠袍關

雞事萬乘軒蓋一何高弓推宜山虎手接太山孫酒後

競風彩三杯弄寶刀殺人如翦草劇孟同遊遨發憤去

函谷從軍向臨洮叱咤萬戰場

一作經百戰

匈奴盡波濤歸

來使酒氣未肯拜蕭曹羞入原憲室荒徑隱蓬蒿

苦思行

曹植

綠蘿緣玉樹光曜粲相暉下有兩真人舉翅翮高飛我心何踴躍思欲攀雲追鬱鬱西嶽顛石室青葱與天連中有耆年一隱士鬚髮皆皓然策杖從吾遊教我忘言

升天行二首

曹植

樂府解題曰升天行曹植云日月何時留

鮑照云家世宅關輔曹植又有上仙錄與  
神遊五遊龍欲升天等物皆傷人世不永  
俗情險艱當求神仙翱翔六合之外與飛  
龍仙人遠遊篇前緩聲歌同意按龍欲升  
天即當牆欲高行也

乘蹻追術士遠之蓬萊山靈液飛素波蘭桂上參天玄

豹遊其下翔鵬戲其顛乘風忽登舉彷彿

一作  
彷徨

見衆仙

扶桑之所出乃在朝陽谿中心陵蒼昊布葉蓋天涯日

出登東榦既夕沒西枝願得紆陽轡迴日使東馳

同前

鮑照

家世宅關輔勝帶官王城備聞十帝事委曲兩都情倦  
見物興衰驟覩俗屯平翩翩一作翩翩類迴掌恍惚似朝榮

窮塗悔短計晚志愛長生從師入遠嶽結友事仙靈五  
芝發金記九籥隱丹經風淦委松宿雲臥恣天行冠霞

金綵閣解玉飲

一作隱

椒庭暫遊越萬里近別數千齡鳳

臺無還駕蕭管有遺聲何時

一作當

與爾曹啄腐共吞腥

同前

劉孝勝

堯攀已徒說湯捫亦妄陳  
欲訪青雲侶正遇丹丘人  
少翁俱仕漢韓終苦入秦  
汾陰觀化鼎瀛洲宴羽人  
廣成參日月方朔問一作捫  
星辰驚祠伐楚樹射藥戰江神  
閭闔皆魯倚太一豈難親  
趙簡猶聞樂周儲固上賓  
秦皇多忌害元朔少寬仁  
終無良有以非關德不鄰

同前

盧思道

尋師得道訣輕舉厭人羣  
玉山候王母珠庭謁老君  
煎

為返魂藥刻作長生文飛策乘流電影軒曳白雲玄洲  
望不極赤野曉無垠金樓旦巖岨玉樹曉氛氲擁琴遙  
可望吹笙遠詎聞不覺蜉蝣子死葬何紛紛

同前

僧齊己

身不沉骨不重驅青鸞駕白鳳幢蓋飄飄入冷空天風  
瑟瑟星河動瑤闕參差阿母家樓臺戲閑凝彤霞五三  
仙子乘龍車堂前碾爛蟠桃花回頭却顧蓬山頂一點  
濃嵐在深井

雲中白子高行

傳 玄

陵陽子來明意欲作天與仙人遊超登元氣攀日月遂  
造天門將上謁閭闔見紫微絳闕紫宮崔嵬高殿嵯  
峨雙闕萬丈玉樹羅童女掣電童男挽雷車雲漢隨天  
流浩浩如江河因王長公謁上皇鈞天樂作不可詳龍  
仙神仙教我靈祕八風子儀與遊我祥我心何戚戚思  
故鄉俯看故鄉二儀設張樂哉二儀日月運移地東南  
傾天西北馳鶴五氣所補黿四足所支齊駕飛龍膠赤

螭逍遙五嶽間東西馳長與天地並復何為復何為

樂府詩集卷六十三



欽定四庫全書

樂府詩集卷六十四

宋 郭茂倩 輯

雜曲歌辭

五遊

曹 植

九州不足步願得凌雲翔逍遙八紘外遊目歷遐荒披  
我丹霞衣襲我素霓裳華蓋紛掩藹六龍仰天驤曜靈  
未移景條忽造昊蒼闔闔啓丹扉雙闕曜朱光徘徊文

昌殿登陟太微堂上帝休西櫺羣后集東廂帶我瓊瑤  
佩漱我沆瀣漿踟躕玩靈芝徙倚弄華芳王子奉仙藥  
美門進奇方服食亭遐紀延壽保無疆

遠遊篇

曹植

楚辭遠遊章句曰悲時俗之迫阨兮願輕  
舉而遠遊質菲薄而無因兮焉託乘而上  
浮王逸云遠遊者屈原之所作也屈原履  
方直之行不容於世困於讒佞無所告訴

乃思與仙人俱遊戲周歷天地無所不至  
焉周王褒又有輕舉篇亦出於此

遠遊臨四海俯仰觀洪波大魚若曲陵承浪相經過靈  
鼈戴方丈神嶽儼嵯峨仙人翔其隅玉女戲其阿瓊藥  
可療飢仰漱吸朝霞崑崙本吾宅中州非吾家將歸謁  
東父一舉超流沙鼓翼舞時風長嘯激清歌金石固易  
弊日月同光華齊年與天地萬乘安足多

輕舉篇

王褒

天地能長久神仙壽不窮白玉東華檢方諸西嶽童我  
瞻少海北暫別扶桑東俯觀雲似蓋低望月如弓看棋  
城邑改辭家墟巷空流珠餘舊竈種杏發新叢酒釀瀛  
洲玉劍鑄昆吾銅誰能攬六博還當訪井公

仙人篇

曹植

樂府廣題曰秦始皇三十六年使博士為  
仙真人詩遊行天下令樂人歌之曹植仙  
人篇曰仙人攬六著言人生如寄當養羽

翼徘徊九天以從韓終王喬於天衢也齊  
陸瑜又有仙人覽六著篇蓋出於此

仙人攬六著對博太山隅湘娥拊琴瑟秦女吹笙竽玉  
樽盈桂酒河伯獻神魚四海一何局九州安所如韓終  
與王喬要我於天衢萬里不足步輕舉凌太虛飛騰踰  
景雲高風吹我軀迴駕觀紫微與帝合靈符閭闔正嵯  
峨雙闕萬丈餘玉樹扶道生白虎夾門樞驅風遊四海  
東過王母廬俯觀五嶽間人生如寄居潛光養羽翼進

趣且徐徐不見昔軒轅升龍出鼎湖徘徊九天下與爾  
長相須

仙人覽六著篇

陸瑜

九仙會歡賞六著且娛神戲谷聞餘地銘山憶舊秦避  
敵情思功論兵勢重新問取南皮夕還笑拂暴人

神仙篇

王融

命駕瑤池側

一作  
偶

過息羸女臺長袖何靡靡簫管清且

哀壁門涼月舉珠殿秋風迴青鳥驚高羽王母停玉杯

舉手慙為別千年將復來

同前

戴嵩

徒聞石為火未見坂停丸  
暫數盈虛月長隨晝夜瀾  
辭家試學道逢師得姓韓  
閭山金靜室蓬丘銀露壇  
安平醞仙酒渤海轉神丹  
初飛喜退鳳新學法乘鸞  
十芒生月朧六猷起星肝  
闕瓊播疑俗信玉類陽官玄  
都宴晚集紫府事朝看謝  
手今為別進憐此俗難

同前

張正見

瀛州分渤海閭苑隔虹蜺欲識三山路須尋千仞溪石  
梁雲外去蓬丘霧裏迷年深毀丹竈學久棄青泥葛水  
留還杖天衢鳴去雞六龍驤首起雲閣萬里一別何寥  
廓玄都府內駕青牛紫蓋山中乘白鶴尋陽杏花終難  
朽武陵桃花未曾落已見玉女笑投壺復覩仙童欣六  
博同甘玉文棗俱飲流霞藥鸞歌鳳舞集天台金闕銀  
宮相向開西王已令青鳥去東海還馭赤虬來魏武還  
車逢漢女荆王因夢識陽臺鳳蓋隨雲聊蔽日霓裳雜



雨復乘雷神嶽吹笙遙謝手當知福地有神才

同前

盧思道

浮生厭危促名嶽共招攜雲軒遊紫府風駟上丹梯時  
見遼東鶴屢聽淮南雞玉英持作寶瓊實採成蹊飛策  
揚輕電懸旌耀彩蜺瑞銀光似燭靈石髓如泥寥廓鸞  
山右超越鳳洲西一丸應五色持此救人迷

同前

魯范

王遠尋仙至樂巴訪術迴乘空向紫府控鶴下蓬萊霜

分白鹿駕日映流霞杯煎金丹未熟醒酒藥初開乍應  
觀海變誰肯畏年積

神仙曲

李賀

碧峰海面藏靈書上帝揀作神仙居晴時笑語聞空虛  
闕乘巨浪騎鯨魚春羅剪字邊王母共宴紅樓最深處  
鶴羽衝風過海遲不如卻使青龍去猶疑王母不相許  
垂露娃鬟更傳語

昇仙篇

梁簡文帝

少室堪求道明光可學仙丹綰碧林宇綠玉黃金篇雲  
車了無轍風馬詎須鞭靈桃恒可餌幾迴三千年

飛龍篇

曹植

楚辭離騷曰為余駕飛龍兮雜瑤象以為  
車曹植飛龍篇亦言求仙者乘飛龍而昇  
天與楚辭同意按琴曲亦有飛龍引

晨遊泰山雲霧窈窕忽逢二童顏色鮮好乘彼白鹿手  
翳芝草我知真人長跪問道西登玉堂

一作臺

金樓復道

授我仙藥神皇所造教我服食還精補腦壽同金石永  
世難老

應龍篇

張正見

張正見應龍篇言龍未起時乃在淵底藏  
以諭君子隱居養志以待時也廣雅曰有  
鱗曰蛟龍有翼曰應龍有角曰虬龍無角  
曰螭龍

應龍未起時乃在淵底藏非雲足不蹈舉則冲天翔譬

彼野蘭草幽居常獨香清風播四遠萬里望芬芳隱居  
可頗志自見焉得彰

關雎篇

曹植

春秋左氏傳曰季郇之雞闕季氏介其雞  
郇氏為之金距杜預云擣芥子播其羽也  
或曰以膠沙播之為介雞鄴都故事曰魏  
明帝大和中築關雎臺趙王石虎亦以芥  
羽漆砂闕雎于此故曹植詩云關雎東郊

道走馬長楸間是也

遊目極妙伎清聽厭宮商主人寂無為衆賓進樂方長  
筵坐戲客闕難觀閒房羣雄正翕赫雙翹自飛揚揮羽  
邈清風悍目發朱光紫落輕毛散嚴距往往傷長鳴入  
青雲扇翼獨翱翔願蒙狸膏助常得擅此場

同前

劉孝威

丹雉翠翼張妬敵復專場翅中含芥粉距外耀金芒氣  
踰上黨列名愧下韝良祭橋愁魏后食跖忌齊王願賜

淮南樂一使雲間翔

盤石篇

曹植

盤石山巔石飄颻澗底蓬我本太山人何為客海東  
藿葭彌斥土林木無分重岸巖若崩缺湖水何沟沟蚌蛤  
被濱涯光彩如錦虹高彼凌雲霄浮氣象螭龍鯨羨若  
五陵鬚若山上松呼吸吞船櫓澎湃戲中鴻方舟尋高  
價珍寶麗以通一舉必千里乘颶舉帆幢經危履險阻  
未知命所鍾常恐沈黃壚下與鼃鼃同南極蒼梧野遊

盼窮九江中夜指參辰欲師當定從仰天長太息思想  
懷故邦乘桴何所志于嗟我孔公

驅車篇

曹植

驅車揮駕馬東到奉高城神哉彼太山五嶽專其名隆  
高貫雲霓嵯峨出太清周流二六候間置十二亭上有  
涌醴泉玉石揚華英東北望吳野西眺觀日精魂神所  
繫屬逝者感斯征王者以歸天效厥元功成厯代無不  
遵禮祀有品程探策或長短唯德享利貞封者七十帝



軒皇元獨靈，食霞漱沆瀣。毛羽被身形，發舉蹈虛廓。徑  
廷升窈冥，同壽東父年。曠代永長矣。

種葛篇

曹植

種葛南山下，葛藟自成陰。與君初婚時，

一作初  
定婚

結髮恩

義深歡愛在，枕席宿昔同。衣衾竊慕棠棣篇，好樂和瑟  
琴。行年將晚，莫佳人懷異心思。紀曠不接，我情遂抑。沉  
出門當何顧，徘徊步北林。下有交頸獸，仰見雙棲禽。攀  
枝長歎息，淚下沾羅襟。良馬知我悲，延頸代我吟。昔為

同池魚今為商與參往古皆歡遇我獨困於今棄置委  
天命悠悠安可任

秋蘭篇

傅玄

秋蘭本出於楚辭離騷云秋蘭兮麝蕪羅  
生兮堂下綠葉兮素華芳菲菲兮襲予蘭  
香草言芳香菲菲上及於我也傅玄秋蘭  
篇云秋蘭蔭玉池池水且芳香具旨言婦  
人之託君子猶秋蘭之蔭玉池與楚辭同

意

秋蘭蔭玉池池水且芳香芙蓉隨風發中有雙鴛鴦雙  
魚自湧濯兩鳥時迴翔君其一作期歷九秋與妾同衣裳

松柏篇

鮑照

松柏篇鮑照擬傅玄樂府龜鶴篇而作也  
松柏受命獨歷代長不衰人生浮且脆歎若晨風悲東  
海遡逝川西山道落暉南郭悅籍短蒿里收永歸諒無  
疇昔時百病起盡期志士惜牛刀忍勉自療治傾家行

藥事顛沛去迎醫徒備火石苦奄至不得辭龜齡安可  
獲依宗限已迫睿聖不得留為善何所益捨此赤縣居  
就被黃壚宅永離九原親長與三辰隔屬續生望盡闔  
棺世業埋事痛存人心恨結亡者懷祖葬既云及壙隧  
亦已開室族內外哭親疏同共哀外姻遠近至名列通  
夜臺扶輿出殯宮低迴戀庭室天地有盡期我去無還  
日居者今已盡人事從此畢火歇烟既沒形銷聲亦滅  
鬼神來依我生人永辭訣大莫杳悠悠長夜無時節鬱

烟重冥下煩寃難具說安寢委沉冥戀戀念平生事業  
有餘結形迹未及成資儲無甌石兒女皆孩嬰一朝放  
捨去萬恨纏我情追憶世上事束教以自拘明發靡怡  
念夕歸多憂虞撇開晨遑流輟宴式酒儒知今瞑目苦  
恨失爾時娛遙遙遠民居獨埋深壤中墓前人跡滅冢  
上草日豐空牀響鳴蜩高松結悲風長寐無覺期誰知  
逝者窮生存處交廣連榻舒華裯已沒一何苦楮哉不  
容身昔日平居時晨夕對六親今日掩奈何一見無諧

因禮席有降殺三齡速過隙几筵就收撤室宇改疇昔  
行女遊歸途仕子復王役家世本平常獨有亡者劇時  
祀望歸來四節靜坐孝子撫墳號父子知來不欲還  
心依戀欲見絕無由煩冤荒隴側肝心盡崩抽

采菊篇

梁簡文帝

月精麗草散秋株洛陽少婦絕妍姝相喚一作呼提筐采  
菊珠朝起露濕霑羅襦東方千騎從驪駒豈不下山逢  
故夫

飛塵篇

傅玄

飛塵穢清流朝雲蔽日光秋蘭豈不芬鮑肆亂其芳河  
決潰金堤一手不能障

閭闔篇

梁武帝

張衡西京賦曰表峽闕於閭闔閭闔天門  
也立爲闕以象之薛綜云紫微宮門名曰  
閭闔也閭闔篇蓋出於此

西漢本佳妍金馬望甘泉衛尉屯兵上期門曉漏傳猶

重河東賦欲以

一作知

追神仙羽騎凌雲轉閭闔帶空懸

長旗掃月窟鳳迹輟星躔但使丹砂就能令憶萬年

登名山行

名山本鎮地迢遞上凌霄雲披金澗近霧起石梁遙翠  
微橫鳥路珠樹拂星橋風急清溪晚霞散赤城朝寓目  
幽樓客駕口尋綺李跡絕桃源士忘情漆園吏沉冥負  
俗心疎索凌雲意蒼蒼聳極天伏眺盡山川疊峰如積  
浪分崖若斜煙淺深聞渡雨輕重聽飛泉采藥逢三島



尋真遇九仙藏書凡幾代看傳已經年逝將追羽客十  
載一來旋

西長安行

傅玄

樂府解題曰西長安行晉傅休奕云所思  
兮何在乃在西長安其下因叙別離之意  
也三輔舊事曰長安城以北斗周地圖記  
曰長安城南為南斗形北為北斗形通典  
曰漢高帝自櫟陽徙都長安至惠帝方發

人徒築城即長安西北古城是也

所思兮何在乃在西長安何用存問妾香橙雙珠環何  
用重存問羽爵翠琅玕令我兮問君更有兮異心香亦  
不可燒環亦不可沈香燒日有歇環沈日自深

齊謳行

陸機

漢書曰漢王至南鄭諸將及士卒皆歌謳  
思東歸顏師古曰謳齊歌也謂齊聲而歌  
或曰齊地之歌禮樂志曰齊古謳員六人

梁元帝纂要曰齊歌曰謳是也陸機齊謳  
行備言齊地之美亦欲使人推分直進不  
可妄有所營也

營丘負海曲沃野爽且平洪川控河濟崇山入高冥東  
被姑尤側南界聊攝城海物錯萬類陸產尚千名孟諸  
吞楚夢百二倖秦京惟師恢東表桓后定周傾天道有  
迭代人道無久盈鄙哉牛山歎未及至人情爽鳩苟已  
徂吾子安得停行行將復去長存非吾營

同前

沈約

東秦稱右地川隰固夷袒層峰駕蒼雲濁河流素壤青  
丘良杳鬱雪宮信䟽敞王佐改殷命霸功繆周網

齊歌行

陸厥

黃金徒滿贏不如守章句雪宮紛多士稷下岌成覆

一作

露同載雙連珠

一作壁

合席懸河注垂帷五行下操筆百

金賦華屋大車方高門駟馬驅玄豹空不食南山隱雲

霧

吳趨行

陸機

崔豹古今註曰吳趨行吳人以歌其地陸  
機吳趨行曰聽我歌吳趨趨步也

楚妃且勿歎齊娥且莫謳四坐並清聽聽我歌吳趨吳  
趨自有始請從閭門起閭門何嵯峨飛閣跨通波重櫳  
承遊極迴軒啓曲阿藹藹慶雲被泠泠鮮風過山澤多  
藏育土風清且嘉泰伯導仁風仲雍揚其波穆穆延陵  
子灼灼光諸華王迹積陽九帝功興四遐大皇自富春

矯首頓世羅邦彥應運興粲若春林葩屬城咸有士吳  
邑最為多八族未足侈四姓實名家文德熙淳懿武功  
侔山河禮讓何濟濟流化自滂沲淑美難窮紀商榷為  
此歌

同前

璽滿蓋重簾唯有遠相思藕葉清朝釧何見早歸  
時

一作還

同前

梁元帝

水裏生蔥翅池心恒欲飛蓮花逐牀返何時乘舸歸

會吟行

謝靈運

樂府解題曰會吟行其致與吳趨同會謂  
會稽謝靈運會吟行曰咸共聆會吟

六引緩清唱三調佇繁音列筵皆靜寂咸共聆會吟會  
吟自有初請從文命敷敷績壺冀始刊木至江汜列宿  
炳天文負海橫地里連峰競十仞背流各百里漉地溉  
粳稻輕雲暖松杞兩京愧佳麗三都豈能似層臺指中

天高墉積崇雉飛燕躍廣途鷁首戲清沚肆呈窈窕容  
路曜嫵媚子自來彌世代賢達不可紀句踐善廢興越  
叟識行止范蠡出江湖梅福入城市東方就旅逸梁鴻  
去桑梓牽綴書土風辭殫意未已

樂府詩集卷六十四



欽定四庫全書

樂府詩集卷六十五

宋 郭茂倩 輯

雜曲歌辭

北風行

鮑 照

北風本衛詩也北風詩曰北風其涼雨雪  
其雱傳云北風寒涼病害萬物以喻君政  
暴虐百姓不親也若鮑照北風涼李白燭

卷六十五  
龍棲寒門皆傷北風雨雪而行人不歸與  
衛詩異矣

北風涼雨雪零京洛女兒多嚴妝遙豔帷中自悲傷  
沉吟不語若為有一作忘問君何行何當歸苦使妾坐自傷  
悲慮年至一作去慮顏衰情易復恨難追

同前

李白

燭龍棲寒門光曜猶旦開日月照之何不及此唯有北  
風號怒天上來燕山雪花大如席片片吹落軒轅臺幽

州思婦十二月停歌罷笑雙蛾摧倚門望行人念君長  
城苦寒良可哀別時提劍救邊去遺此虎文金髀釵中  
有一雙白羽箭蜘蛛結網生塵埃箭空在人今戰死不  
復迴不忍見此物焚之已成灰黃河捧土尚可塞北風  
雨雪恨難裁一作哉

苦熱行

鮑照

魏曹植苦熱行曰行遊到日南經歷交趾  
鄉苦熱但曝露越夷水中藏樂府解題曰

苦熱行備言流金礫石火山炎海之艱難  
也若鮑照云赤阪橫西阻火山赫南威言  
南方瘴癘之地盡節征伐而賞之太薄也

赤阪橫西阻火山赫南威身熱頭且痛烏墮魂未歸湯  
泉發雲潭焦烟起石磯日月有恒昏雨露未嘗晞丹蛇  
踰百尺玄蜂盈十圍含沙射流影吹蠱病行暉瘴氣晝  
薰體茵露夜霑衣饑猿莫下食晨禽不敢飛毒涇尚多  
死渡瀘寧具腓生軀蹈死地昌志登一作高禍機戈船榮

既薄伏波賞亦微爵輕君尚惜士重安可希

同前

梁簡文帝

六龍驚不息三伏起炎陽寢興煩几案俯仰倦幃床  
澆汗似鑠微靡風如湯洄池愧玉浪蘭殿非含霜細簾  
時半卷輕幌乍橫張雲斜花影沒日落荷心香願見漢  
崖井詎憐河朔觴

同前

任昉

旭旦烟雲卷烈景入東軒傾光望轉蕙斜日照西垣既

卷焦梧葉復傾葵藿根重簾無冷氣挾石似懷溫霰霏  
類珠綴喘嚇狀雷奔

同前

何遜

昔聞草木焦今覩沙石爛  
瞠瞠風愈靜瞳瞳日漸旰  
習靜悶衣巾讀書煩几案  
卧思清露浥坐待明星燦  
蝙蝠戶間飛蟻蠓窗中亂  
會無河朔飲室有臨淄汗  
遺金自不拾惡木寧無幹  
願以三伏晨催促九秋換

同前

庾信

火井沈熒散炎洲高燄通鞭石未成雨鳴鳶不起風思  
為鸞翼扇願備明光宮臨淄迎子禮中散就安豐美酒  
含蘭氣甘瓜開蜜筒寂寥人事屏還得隱牆東

同前

王維

赤日滿天地火雲成山嶽草木盡焦卷川澤皆竭涸輕  
紈覺衣重密樹苦陰薄莞簟不可近絺綌再三濯思出  
宇宙外曠然在寥廓長風萬里來江海蕩煩濁却顧身  
為患始知心未覺忽入甘露門宛然清涼樂

同前

王穀

祝融南來鞭火龍  
火旗焰焰燒天紅  
日輪當午凝不去  
萬國如在洪爐中  
五嶽翠乾雲彩滅  
陽侯海底愁波竭  
何當一夕金風發  
為我掃却天下熱

同前

僧皎然

六月金數伏  
茲辰日在庚  
炎曦曝肌膚  
毒霧昏檐楹  
安得奮翅翮  
超遙出雲征  
不知天地心  
如何匠生成  
火德燒百卉  
瑤草不及榮  
省客當此時  
忽貽懷中瓊  
捧翫煩



袂滌嘯歌美風生遲君佐元氣調使四序平中令霜不  
祇火餘氣常貞江南詩騷客休吟苦熱行

同前

僧齊己

離宮劃開赤帝怒喝起六龍奔日馭下土熬熬若煎煮  
蒼生惶惶無處處火雲崢嶸焚沈寥東臯老農腸欲焦  
何當一雨蘇我苗為君擊壤歌帝堯

太行苦熱行

劉長卿

迢迢太行路自古稱險惡千騎儼欲前羣峰望如削火

雲從中起仰視飛鳥落汗馬卧高原危旌倚長薄清風  
何不至赤日方煎爍石露山木焦鱗窮水泉涸九重今  
肝食萬里傳明略諸將候軒車元兇愁鼎鑊何勞短兵  
接自有長纓縛通越事豈難渡瀘功未博朝辭羊腸坂  
夕望貝丘郭漳水斜遶營常山遙入幕永懷姑蘇下因  
寄建安作白雪和誠難滄波意空托陳琳書記好王粲  
從軍樂早晚歸漢庭隨君上麟閣

同前

獨孤及

駟馬上太行脩途亘遼碣王程無畱駕日昃未遑歇請  
問此何時恢台朱明月長蛇稽天討上將方北伐明主  
命使臣皇華得時傑已忘羊腸險豈憚溫風熱搖策汗  
滂沱登崖思紆結炎雲如烟火溪谷將恐竭晝景赧可  
畏涼飈何由發山長飛鳥墮目極行車絕趙魏方倣擾  
安危俟明哲歸路豈不懷飲冰有苦節會同傳檄至疑  
議立談決況有阮元瑜翩翩秉書札起予歌赤坂水好  
踰白雪誰念剖竹人無因執羈紲

春日行

鮑照

獻歲發春吾將行春山茂春日明園中鳥多嘉聲梅始  
發柳始青汎舟臚齊棹驚奏採菱歌鹿鳴風微起波微  
生一作微波起微風生弦亦發酒亦傾入蓮池折桂枝芳袖動芬  
葉披兩相思兩不知

同前

李白

深宮高樓入紫清金作蛟龍盤繡楹

一作繡作楹

佳人當窗

弄白日弦將手語彈鳴箏春風吹落君王耳此曲乃是

升天行因出天池汎蓬瀛樓船蹙沓波浪驚三千雙蛾  
獻歌笑過鐘考鼓宮殿傾萬姓聚舞歌太平我無為人  
自寧三十六帝欲相迎仙人飄翩下雲軿帝不去畱鑄  
京安能為軒轅獨往入宵冥小臣拜獻南山壽陛下萬  
古垂鴻名

同前

張籍

春日融融池上暖竹牙出土蘭心短草堂晨起酒半醒  
家僮報我園已滿頭上皮冠未曾整直入花間不尋徑

樹樹殷勤盡遶行舉枝未徧春日暝不用積金著青天  
不用服藥求神仙但願園裏花長好一生飲酒花前老

朗月行

鮑照

朗月出東山照我綺窗前窗中多佳人被服妖且妍靚  
妝坐幃裏當戶弄清弦鬢奪衛女迅體絕飛燕先為君  
歌一曲當作朗月篇

一作堂上朗月篇

酒至顏自解聲和心亦

宣千金何足重所存意氣閒

同前

李白

小時不識月呼作白玉盤又疑瑤臺鏡飛在青雲端仙  
人垂兩足桂樹作團團白兔擣藥成問言與誰餐蟾蜍  
蝕圓影天明夜已殘羿替落九烏天人清且安陰精此  
淪惑去去不足觀憂來其如何惻愴摧心肝

明月篇

傅玄

皎皎明月光灼灼朝日暉替為春蠶絲今為秋女衣丹  
脣列素齒翠彩發蛾眉嬌子多好言歡合易為姿玉顏  
盛有時秀色隨年衰常恐新間舊變故興細微浮萍本

無根

一作浮萍  
無根本

非水將何依憂喜更相接樂極還自悲

明月子

謝燮

杪秋之遙夜明月照高樓登樓一廂望望見東

一作南陌

頭故人眇千里言別歷九秋相思不相見望望空離憂

堂上歌行

鮑照

四坐且莫

一作勿

誼聽我堂上歌替仕京洛時高門臨長

河出入重宮裏結友曹與何車馬相馳逐賓朋好容華

陽春孟春月朝光散流霞輕步逐芳風言笑弄丹葩暉



暉朱顏醅紛紛織女梭滿堂皆美人目成對湘娥雖謝  
詩君閒明妝帶綺羅箏笛更彈吹高唱好相和萬曲不  
闌情一作心一曲動情多欲知情厚薄更聽此聲過

前有一罇酒行

傅玄

置酒結此會主人起行觴玉罇兩楹間絲理東西廂舞  
袖一何妙變化窮萬方賓主齊德量欣欣樂未央同享  
千年壽朋來會此堂

同前

陳後主

殿高絲吹滿日落綺羅鮮莫論朝漏促傾危待夕筵

同前

張正見

前有一罇酒主人行壽今日合來坐者當今皆富且壽  
欲令主人三萬歲終歲不知老為吏當高遷賈市得萬  
倍桑蠶當大得主人宜子孫

同前二首

李白

春風東來忽相過金罇綠酒生微波落花紛紛稍覺多  
美人欲醉朱顏酡青軒桃李能幾何流光欺人忽蹉跎

君起舞日西夕當年意氣不肯傾白髮如絲歎何益  
琴奏龍門之綠桐玉壺美酒清若空催弦拂柱與君飲  
看朱成碧顏始紅胡姬貌如花當壚笑春風笑春風舞  
羅衣君今不醉欲安歸

前緩聲歌

古詞

晉陸機前緩聲歌曰游仙聚靈族高會曾  
城阿言將前慕仙游冀命長緩故流聲於  
歌曲也宋謝惠連又有後緩聲歌大略戒

居高位而為讒諂所蔽與前歌之意異矣  
按緩聲本謂歌聲之緩非言命也又有緩  
歌行亦出於此

水中之馬必有陸地之船但有意氣不能自前心非木  
石荊根株數得覆益天當復思東流之水必有西上之  
魚不在大小但有朝於復來長笛續短笛欲今皇帝陛  
下三十萬歲

同前

陸機

遊仙聚靈族高會曾城阿長風萬里舉慶雲鬱嵯峨  
妃興洛浦王韓起太華北徵瑤臺女南要湘川娥肅肅  
霄駕動翩翩翠蓋羅羽旗棲瓊鸞玉衡吐鳴和太容揮  
高弦洪崖發清歌獻酬既已周輕舉乘紫霞總轡扶桑  
枝一作底濯足暘谷波清輝溢天門垂慶惠皇家

同前

孔寧子

供帳設玄宮衆仙胥闕亞焘焘二儀曠雍容風流暇北  
發太行鼓南整九疑駕笙歌興洛川鳴簫起秦樹鈞天

異三代廣樂非韶夏滿堂皆人靈列筵必羽化烏可循  
日留兔自延月夜弱水時一濯扶桑聊翫舍兆旬方履  
端千齡闕八蟠

同前

沈約

羽人廣宵宴帳集瑤池東開霞泛綵靄澄露迎香風龍  
駕出黃苑帝服起河宮九疑輶烟雨三山馭螭鴻玉鑾  
乃排月瑤輶信凌空神行燭玄漠帝旆委曾虹簫歌笑  
羸女笙吹悅姬童瓊漿且未洽羽轡已騰空息鳳曾城

曲滅景清都中降祐集皇代委祚溢華嵩

同前

謝惠連

羲和纖阿去嵯峨覩物知命使余轉欲悲歌憂戚人心  
胸處山勿居峰在行勿為公居鋒大阻銳為公遇讒蔽  
邪琴自踈越雅韻能揚揚滑滑相混同終始福祿豐

緩歌行

謝靈運


飛客結靈友凌空萃丹丘習習和風起采采彤雲浮娥  
皇發湘浦宵明出河州宛宛連螭轡裔裔振龍旒

同前

李頎

小身託身攀貴遊，傾財破產無所憂。  
莫擬經過石渠署，朝將出入銅龍樓。  
結交杜陵輕薄子，謂言可生復可死。  
一沉一浮會有時，棄我翻然如脫屣。  
男兒立身須自彊，十五閉戶潁水陽。  
業就功成見明主，擊鐘鼎食坐華堂。  
二八蛾眉梳墮馬，美酒清歌曲房下。  
文昌宮中賜錦衣，長安陌上退朝歸。  
五侯賓從莫敢視，三省官寮揖者稀。  
早知今日讀書是，悔作從來任俠非。





樂府詩集卷六十五

欽定四庫全書

集部

樂府詩集卷六十八

詳校官庶吉士臣柳邁祖

助教臣常循覆勘

總校官知縣臣繆琪

校對官編修臣秦瀛

謄錄監生臣孫承基

欽定四庫全書

樂府詩集卷六十六

雜曲歌辭

結客少年場行

鮑照

後漢書曰祭遵嘗為部吏所侵結客殺人  
曹植結客篇曰結客少年場報怨洛北邙  
樂府解題曰結客少年場行言輕生重義

慷慨以立功名也廣題曰漢長安少年殺  
吏受財報仇相與探丸為彈探得赤丸斫  
武吏探得黑丸殺文吏尹賞為長安令盡  
捕之長安中為之歌曰何處求子死柏東  
少年場生時諒不謹枯骨復何葬按結客  
少年場言少年時結任俠之客為遊樂之  
場終而無成故作此曲也

驄馬金絡頭錦帶佩吳鉤失意杯酒間白刃起相讎追

兵一旦至負劒遠行遊去鄉三十載復得還舊丘升高

臨四闕

一作塞

表裏望皇州九衢平若水雙闕似雲浮扶

宮羅將相夾道列王侯日中市朝滿車馬若川流擊鐘  
陳鼎食方駕自相求今我獨何為輾轉懷百憂

同前

劉孝威

少年本六郡遨遊遍五都挿腰銅匕首障日錦塗蘇驚  
羽裝銀鍬犀膠飾象弧近發連雙兔高彎落九烏邊城  
多警急節使滿郊衢居延箭箠盡疎勒井泉枯正蒙都

護接何由憚險途千金募惡少一麾擒骨都勇餘聊感  
鞠戰罷戲投壺昔為北方將今為南面孤拜君行負弩  
縣令且前驅

同前

庾信

結客少年場春風滿路香歌撩李都尉果擲潘河陽折  
一作隔花遙勸酒就水更移床今年喜夫壻新拜羽林郎  
定知劉碧玉偷嫁汝南王

同前

孔紹安

結客佩吳鉤，橫行度隴頭。  
雁在弓前落，雲從陣後浮。  
吳師驚燧象，燕將警奔牛。  
轉蓬飛不息，冰河結未流。  
若使三邊定，當封萬里侯。

同前

虞世南

韓魏多奇節，倜儻遺名利。  
共矜然諾心，各負縱橫志。  
結友一言重，相思千里志。  
綠沉明月弦，金絡浮雲轡。  
吹簫入吳市，擊筑遊燕肆。  
尋源博望侯，結客遠相求。  
少年重一顧，長驅背隴頭。  
燄燄霜戈動，耿耿劒虹浮。  
天山冬夏



雪交河南北流雲起龍沙暗木落雁行秋輕生徇知己  
非是為身謀

同前

虞羽客

幽并俠少年金絡空連錢竊符方救魏擊筑正懷燕輕  
生辭鳳闕揮袂上祁連陸離橫寶劍出沒驚徂旂蒙輪  
恒顧敵超乘忽爭先摧枯逾百戰拓地遠三千骨都魂  
已散樓蘭首復傳龍城含曉霧瀚海隔遙天歌吹金微  
返振旅玉門旋烽火今已息非復照甘泉

同前

盧照隣

長安重游俠洛陽富才雄玉劍浮雲騎金鞍明月弓關  
難過渭北走馬向關東孫賓遙見待郭解暗相通不受  
千金爵誰論萬里功將軍下天上虜騎入雲中烽火夜  
似月兵氣曉成虹橫行徇知己負羽遠征戎龍旌昏朔  
霧鳥陣卷寒風追奔瀚海咽戰罷陰山空歸來謝天子  
何如馬上翁

同前

李白

紫鷺黃金瞳啾啾

一作稜稜

搖綠髮平明相馳逐結客洛門

東少年學劍術凌轡白猿公珠袍曳錦帶匕首插吳鴻  
由來萬夫勇挾此生雄風託交從劇孟買醉入新豐笑  
盡一杯酒殺人都市中羞道易水寒從今日貫虹燕丹  
事不立虛沒秦帝宮武陽死灰人安可與成功

同前

沈彬

重義輕生一劍知白虹貫日報讎歸片心惆悵清平世  
酒市無人問布衣

少年子

王融

聞有東方騎遙見上頭人待君送客返桂釵當自陳

同前

吳均

董生能巧笑子都信美目百萬市一言千金買相逐不  
道參差菜誰論窈窕淑願言奉繡被來就越人宿

同前

李百藥

少年飛翠蓋上路動金鑣始酌文君酒新吹弄玉簫少  
年不歡樂何以盡芳朝千金笑裏面一搦抱中腰掛冠

豈憚宿迎拜

一作落珥

不勝嬌寄語少年子無辭歸路遙

同前

李白

青雲年少子挾彈章臺左鞍馬四邊開突如流星過金  
九落飛鳥夜入瓊樓卧夷齊是何人獨守西山餓

少年樂

李賀

芳草落花如錦地二十長遊醉鄉裏紅纓不重白馬驕  
垂柳金絲香拂水吳娥未笑花不開綠鬢聳墮蘭雲起  
陸郎倚醉牽羅袂奪得寶釵金翡翠

同前

張祐

二十便封侯名居第一流  
綠鬟深小院清管下高樓  
醉把金船擲閑敲玉鐙遊  
帶盤紅鸕鼠袍研紫犀牛  
錦袋歸調箭羅鞋起撥毡  
眼前長貴盛那信世間愁

少年行三首

李白

擊筑飲美酒劒歌易水湑  
經過燕太子結託并州兒  
少年負壯氣奮烈自有時  
因聲魯句踐爭情博一作勿相欺  
五陵年少金市東銀鞍白馬度  
春風落花踏盡遊何處

笑入胡姬酒肆中

君不見淮南少年遊俠客  
白日毬獵夜擁擲  
呼盧百萬終不惜  
報讎千里如咫尺  
少年遊俠好經過  
渾身裝束皆綺羅  
蘭蕙相隨喧妓女  
風光去處滿笙歌  
驕矜自言不可有  
俠士堂中養來久  
好鞍好馬乞與人  
十千五千旋沽酒  
赤心用盡為知己  
黃金不惜栽桃李  
桃李栽來幾度春  
一回花落一回新  
府縣盡為門下客  
王侯皆是平交人  
男兒百年且樂命  
何須徇書受貧病  
男兒百年

且榮身何須徇節甘風塵衣冠半是征戰士窮儒浪作  
林泉民遮莫枝根長百丈不如當代多還往遮莫親姻  
連帝城不如當身自簪纓看取富貴眼前者何用悠悠  
身後名

同前四首

王維

新豐美酒斗十千咸陽遊俠多少年相逢意氣為君飲  
繫馬高樓垂柳邊

漢家君臣歡宴終高義雲臺論戰功天子臨軒賜侯印



將軍佩出明光宮

出身仕漢羽林郎初隨驃騎戰漁陽孰知不向邊庭苦  
縱死猶聞俠骨香

一身能臂兩雕弧虜騎千羣只似無偏坐金鞍調白羽  
紛紛射殺五單于

同前二首

王昌齡

西陵俠年少送客過長亭青槐夾兩路白馬如流星聞  
道羽書急單于寇井陘氣高輕赴難誰顧燕山銘

走馬還相尋西樓下夕陰結交期一劍留意贈千金高  
閣歌聲遠重闌柳色深夜閑須盡醉莫負百年心

同前

張籍

少年從出獵長楊禁中新拜羽林郎獨到輦前射雙虎  
君王手賜黃金鐙日日鬪雞都市裏贏得寶刀重刻字  
百里報讎夜出城平明還在倡樓醉遙聞虜到平陵下  
不待詔書馬上行斬得名王獻桂宮封侯起第一日中  
不為六郡良家子百戰始取邊城功

同前三首

李嶷

十八羽林郎戎衣事漢王  
臂鷹金殿側挾彈玉輿旁  
馳道春風起陪遊出建章

侍獵長楊下承恩更射飛塵生  
馬影滅箭落雁行稀薄暮歸隨仗  
聯翩入瑣闥

玉劔膝邊橫金杯馬上傾  
朝遊茂陵道暮宿鳳凰城  
豪吏多猜忌無勞問姓名

同前

劉長卿

射飛誇侍獵行樂愛聯鑣薦枕青娥艷鳴鞭白馬驕曲  
房珠翠合深巷管弦調日晚春風裏衣香滿路飄

同前四首

令狐楚

少小邊州慣放狂驍騎蕃馬射黃羊如今年事無筋力  
猶騎營門數雁行

家本清河住五城須憑弓箭得功名等閒飛鞚秋原上  
獨向寒雲試射聲

弓背霞明劒照霜秋風走馬出咸陽未收天子河隍地

不擬回頭望故鄉

霜滿中庭月過樓  
金鑄玉柱對清秋  
當年稱意須為樂  
不到天明未肯休

同前二首

杜牧

官為駿馬監職帥羽林兒  
兩綬藏不見落花何處期  
獵敲白玉鐙怒袖紫金鉞  
田實長留醉蘇辛曲護岐  
豪持出塞節笑別遠山眉  
捷報雲臺賀公卿拜壽卮

連環羈玉聲光碎  
綠錦蔽泥虬卷高  
春風細雨走馬去

珠落璀璨白罽袍

同前三首

杜甫

莫笑田家老瓦盆  
自從盛酒長兒孫  
傾銀注瓦驚人眼  
共醉終同卧竹根

巢燕養雛渾去盡  
紅花結子已無多  
黃衫年少來宜數  
不見堂前東逝波

馬上誰家白面

一云薄媚

郎臨堦下馬坐人床  
不通姓字麝

豪甚指點銀瓶索酒嘗

同前

張祐

少年足風情垂鞭賣眼行帶金師子小裘錦麒麟  
選匠裝金鐙推錢買鈿箏李陵雖効死時論得虛名

同前

韓翃

千點爛編噴玉驄青絲結尾繡纏髻鳴鞭晚出章臺路  
葉葉春依楊柳風

同前

施肩吾

醉騎白馬走空衢惡少皆稱電不如五鳳街頭閑勒轡

半垂衫袖揖金吾

同前三首

僧貫休

錦衣鮮華手擎鸛閒行氣貌多輕忽稼穡艱難總不知  
五帝三皇是何物

自拳五色毬迸入他人宅卻捉蒼頭奴玉鞭打一百  
面白如削玉猖狂曲江曲馬上黃金鞍適來新賭得

同前

韋莊

五陵豪客多買酒黃金賤醉下酒家樓美人雙翠幃揮



劔邯鄲市走馬梁王苑樂事殊未央年華已云晚

漢宮少年行

李益

君不見上宮警夜營八屯襲襲街鼓朝朱軒玉階霜仗擁未合少年排入銅龍門暗聞弦管九天上宮漏沉沉清吹繁纔明走馬絕馳道呼鷹挾彈通繚垣玉籠金鎖養黃口探雛取卵伴王孫分曹六博快一擲迎歡先意笑語喧巧為柔媚學優孟儒衣嬉戲冠沐猿晚來香街經柳市行過倡市宿桃根相逢杯酒一言失回朱點白

聞至尊金張許史伺顏色王侯將相莫敢論豈知人事  
無定勢朝歡暮戚如掌翻椒房寵移子愛奪一夕秋風  
生戾園徒用黃金將買賦寧知白玉暗成痕持杯收水  
水已覆徙薪避火火更燔欲求四老張丞相南山如天  
不可上

長樂少年行

崔國輔

遺卻珊瑚鞭白馬驕不行章臺折楊柳春草路旁情

長安少年行

何遜

長安美少年羽騎暮連翩玉羈馬腦勒金絡珊瑚鞭陣  
雲橫塞起赤日下城圓追兵待都護烽火望祁連虎落  
夜方寢魚麗曉復前平生不可定空信蒼浪天

同前

沈炯

長安好少年驄馬鐵連錢陳王裝腦勒晉后鑄金鞭步  
搖如飛鷺寶劍似舒蓮去來新市側遨遊大道邊道邊  
一老翁顏鬢如衰蓬自言居漢世少小見豪雄五侯俱  
拜爵七貴各論功建章通北闕複道度南宮太后居長

樂天子出回中玉輦迎飛鷺金山賞鄧通一朝復一日  
忽見朝市空扶桑無復海崑山倒向東少年何假問積  
齡值福終子孫冥滅盡鄉閭復不同淚盡眼方暗髀傷  
耳自聾杖策尋遺老歌嘯詠悲翁邈隨各有遇非敢訪  
童蒙

同前十首

李 廓

金紫少年郎繞街鞍馬光身從左中尉官屬右春坊刻  
戴揚州帽重薰異國香垂鞭踏青草來去杏園芳

追逐輕薄伴閒遊不著緋長攏出獵馬數換打毬衣曉  
日尋花去春風帶酒歸青樓無晝夜歌舞歇時稀

日高春睡足帖馬賞年華倒挿銀魚袋行隨金犢車還  
携新市酒遠醉曲江花幾度歸侵黑金吾送到家

好勝耽長夜天明燭滿樓留人看獨腳賭馬換偏頭樂  
奏曾無歇盃巡不暫休時時遙冷笑怪客有春愁

遨遊攜艷妓裝束似男兒盃酒逢花住笙歌簇馬吹鸞  
聲催曲急春色訝歸遲不以聞街鼓華筵待月移

賞春唯逐勝大宅可曾歸不樂還逃席多狂慣衩衣歌  
人踏月起語燕卷簾飛好婦唯相妬倡樓不醉稀  
戟門連日閉苦飲惜殘春開鎖通新客教姬屈醉人倩  
歌牽白馬自舞蹈紅茵時輩皆相許平生不負身  
新年高殿上始見有光輝玉雁排方帶金鷺立仗衣酒  
深和棹賜馬疾打珂飛朝下人爭看香街意氣歸  
遊市慵騎馬隨姬入坐車樓邊聽歌吹簾外市釵花樂  
眼從人開歸心畏日斜蒼頭來去報飲伴到倡家

小婦教鸚鵡頭邊喚醉醒  
犬嬌眠玉簾鷹掣撼金鈴  
碧地攢花障紅泥待客亭  
雖然長按曲不飲不曾聽

同前

僧皎然

翠樓春酒蝦蟇陵長安少年  
皆共矜紛紛半醉綠槐道  
蹀躞花驄驕不勝

渭城少年行

崔顥

洛陽二月梨花飛秦地行人  
春憶歸揚鞭走馬城南陌  
朝逢驛使秦川客驛使前日  
發章臺傳道長安春早來

棠梨宮中驚初至葡萄館裏花正開念此使人歸更早  
三月便達長安道長安道上春可憐搖風蕩日曲河邊  
萬戶樓臺臨渭水五陵花柳滿秦川秦川寒食盛繁華  
遊子春來喜見花鬪雞下杜塵初合走馬章臺日半斜  
章臺帝城稱貴里青樓日晚歌鐘起貴里豪家白馬驕  
五陵年少不相饒雙雙挾彈來金市兩兩鳴鞭上渭橋  
渭城橋頭酒初熟金鞍白馬誰家宿可憐錦瑟箏琵琶  
玉臺清酒就君家小婦春來不解羞嬌歌一曲楊柳花



邯鄲少年行

高適

邯鄲城南遊俠子，自矜生長邯鄲裏。  
千場縱博家仍富，幾度報讎身不死。  
宅中歌笑日紛紛，門外車馬如雲屯。  
未知肝膽向誰是，令人却憶平原君。  
君不見今人交態薄，黃金用盡還疎索。  
以茲感激一作歎辭舊遊，更於時事無所求。  
且與少年飲美酒，往來射獵西山頭。

同前

鄭錫

霞鞍金口騮，豹袖氍毹裘。  
家住叢臺下，門前漳水流。  
喚

人呈楚舞借客試吳鉤見說秦兵至甘心赴國讎



樂府詩集卷六十六